

廿

澤

謠

附錄





謠 澤 廿

錄 附

撰 郊 袁

叢書集成初編

(補印本)

廿

澤

謠

附

錄

一九三九年十二月初版
一九六〇年五月補印

袁

郊

撰

商務印書館出版

上海洪興印刷廠印刷

本館叢書集成初編所選
唐宋叢書津逮祕書及學
津討原皆收有此書唐宋
本多曼威津逮本多訛脫
學津本曾經校正故據以
排印

甘澤謠目錄

魏先生

素娥

陶峴

嬾殘

聶隱娘

韋駟

圓觀

紅線

許雲封

附錄

東坡刪改圓澤傳并自跋

贊寧記觀道人三生爲比邱

重校甘澤謠序

濮陽李尚書家積書甚富。余自少出公門下。盡得觀覽。獨以未得甘澤謠爲恨。知予心同此好。每進見。必屬訪之。余奔走南北三十載。交遊縉紳之士。殆遍海內。並未有收藏此書者。戊申春。偶在丹陽道中。遇舊所識楚僧廣惠。自言往歲鄉人綦毋秀才。有一緘託寄。公留之篋中。常以自隨。今餘十年。綦生已矣。方將謁公。以畢其志。乃幸遇公于此。予久知生亡。因急發緘視之。則甘澤謠也。奉書掩泣而讀之。曰。自余丙子歲。謬領鄉薦。得侍李公。承李公之知。二十餘年。未有所酬。今公與生皆謝世矣。惠公猶不忘十年之約。竟完璧以付余。百朋之錫。何以加諸。所恨者。李公不得一手攬斯編耳。寧不重可歎哉。謹重錄校訂。其爲書九章。悉完好。但袁郊自序首卷。則損缺不可復讀。所載事。亦皆詭怪難信。蓋多寓言。自宋以來。諸名士多好言之。散見諸集。其書固不可少也。郊唐祠部郎中。書成于咸通戊子。實懿宗改元之九年。春雨中臥病所撰。故以名其書。原本抄寫訛謬。雜取他載錄文字校之。至嘉靖癸丑。始得刪定。閏月朔日。楊儀夢羽記。

甘澤謠

唐 袁郊 撰

魏先生

魏先生生於周家。于宋儒書之外。詳究樂章。隋初。出游關右。值太常考樂。議者未平。聞先生來。競往謁問。先生乃取平陳樂器。與樂官蘇夔。蔡子元等。詳其律度。然後金石絲竹。咸得其所。內致清商署。爲太樂官。斂帛二百段以酬之。先生不復入仕。遂歸梁宋。以琴酒爲娛。及隋末兵興。楊元感戰敗。謀主李密亡命。雁門變。姓名以教授。先生同其鄉曲。由是遂相來往。常論鐘律。李密頗能。先生因戲之曰。觀吾子氣沮而目亂。心搖而語偷。氣沮者新破敗。目亂者無所倚。心搖者神未定。語偷者思有謀于人。今方捕蒲山黨。得非長者庠。李公驚起。執先生手曰。既能知我。豈不能教我與。先生曰。吾子無帝王規模。非將相才略。乃亂世之雄傑耳。李公曰。爲吾辨析行藏。亦當繇此而退。先生曰。夫爲帝王者。包羅天地。儀範古今。外則日用而不知。中則歲功而自立。堯詢四岳。舉鯀而殛羽山。此乃出于無私也。漢任三傑。納良而圍垓下。亦出于無私也。故鳳有爪吻而不施。麟有躩足而永廢者。能得其道而求自集于時。此帝王之規模也。凡爲將帥者。幕建太一旗。驅無戰之師。伐有罪之民。乃珣戈旣授。玉弩斯張。誠負羈之有言。那季良之猶在。所以務其燕犒。致逸待勞。修其屯田。觀豐而動。遂使風生虎嘯。不可抗其威。雲起龍驤。不可攘其勢。仲尼曰。我戰則

克孟軻云。夫誰與敵。此將帥之才也。至有秉其才知。動以機鈴。公於國。則爲帥臣。私於己。則曰亂盜。私于已。必掠取財色。屠其城池。朱亥爲前席之賓。樊期爲升堂之客。朝聞夕死。公孫終敗于邑中。寧我負人。曹操兼于天下。是忘輦千金之貲。報陳一飯之恩。有感謝之人。無懷歸之衆。且魯史之誠曰。度德連山之文。曰待時。尙欲謀于人。不能惠於己。天人厭亂。歷數有歸。時雨降而妖祲除。太陽升而層氷釋。引繩縛虎。難希飛兔之門。赴水持鬯。豈是安生之地。吾嘗望氣。汾晉有聖人生。能往事之。富貴可取。李公拂衣而言曰。隋氏以篡殺取天下。吾家以勳德居人表。振臂一呼。衆心響應。提兵時伐。何往不下。道行可以取四海。不行亦足以王一方。委質於人。誠所未忍。女眞豎儒。不足以計事。遂絕魏生。因寫懷賦詩。爲鄉吏發覺。李公脫身而走。所在收兵。北依黎陽。而南據雒口。連營百萬。與王世充爭衡。首尾三年。終見敗覆。追思魏生之說。卽日遂歸于唐。乃授司農之官。復搆桃林之叛。魏生得道之士。亡其名。蓋文貞之宗親也。

素娥

素娥者。武三思之姬人也。三思初得喬氏。竊娘能歌舞。三思曉知音律。以竊娘歌舞。天下至藝也。未幾沈于雒水。遂族喬氏之家。左右有舉素娥者曰。相州鳳陽門宋媼女。善彈五弦。世之殊色。三思乃以帛三百段往聘焉。素娥旣至。三思大悅。遂盛宴以出素娥。公卿大夫畢集。唯納言狄仁傑稱疾不來。三思怒。于座中有言宴罷。有告仁傑者。明日謝謁三思。曰某昨日宿疾暴作。不果應召。然不覩麗人亦分也。他後或有良宴。敢不先期到門。素娥聞之。謂三思曰。梁公彊毅之士。非款狎之人。何必固抑其性。再燕不可。請不

召梁公也。三思曰：儻阻我燕，必族其家。後數日復宴，客未來。梁公果先至。三思特延梁公坐于內寢，徐徐飲酒，待諸賓客請先出。素娥略觀其藝，遂停杯設榻召之。有頃，蒼頭出曰：素娥藏匿不知所在。三思自入召之，皆不見。忽于堂奧隙中聞蘭麝芬馥，乃附耳而聽。卽素娥語音也。細于屬絲，纔能認辨。曰：請公不召梁公，今固召之。某不復生也。三思問其繇，曰：某非他怪，乃花月之妖。上帝遣來，亦以多言蕩公之心。將與李氏今梁公乃時之正人，某固不敢見。某嘗爲僕妾，寧敢無情。願公勉事梁公，勿萌他志。不然，武氏無遺種矣。言訖，更問亦不應也。三思出見仁傑，稱素娥暴疾，未可出敬事之禮。仁傑莫知其繇。明日三思密奏其事，則天嘆曰：天之所授，不可廢也。

陶峴

陶峴者，彭澤令之孫也。開元中，家于崑山，富有田業，擇家人不欺而了事者，悉付之。身則汎艚江湖，遍遊煙水，往往數歲不歸。見其子孫成人，初不辨其名字也。峴之文學，可以經濟，自謂疎脫，不謀宦游。有生之初，通于八音，命陶人爲璧，潛記歲時，敲取其聲，不失其驗。撰樂錄八章，以定八音之得失。自製三舟，備極堅巧。一舟自載，一舟置寶，一舟貯飲饌。客有前進士孟彥深，進士孟雲卿，布衣焦遂，各置僕妾共載。而峴有女樂一部，奏清商曲，逢奇遇興，則窮其景物，興盡而行。峴且聞名朝廷，又值天下無事，經過郡邑，無不招延。峴拒之曰：某麋鹿閒人，非王公上客，亦有未招而自詣者。係方伯之爲人，江山之可駐耳。吳越之士，號爲水仙，曾有親戚爲南海守，因訪韶友，遂往省焉。郡守喜其遠來，贈錢百萬，遺古劍長二尺許，玉環徑

四寸海舶昆侖奴。名摩訶。善泅水而勇捷。遂悉以所得歸。曰。吾家之三寶也。及回棹下白芷。入湘江。每遇水色可愛。則遺環劍於水。令摩訶下取。以爲戲笑也。如此數歲。因渡巢湖。亦投環劍。而令取之。摩訶纔入。獲劍環。跳波而出焉。曰。爲毒蛇所嚙。遽刃去一指。乃能得免。焦遂曰。摩訶所傷。得非陰靈爲怒乎。犀燭下照。果爲所讐。蓋水府不欲人窺也。峴曰。敬奉諭矣。然某嘗慕謝康樂之爲人。云。終當樂死山水間。但殉所好。莫知其他。且栖遲於逆旅之中。載于大塊之上。居布素之賤。擅貴遊之歡。浪跡怡情。垂三十年。固其分也。不得升王墀。見天子。施功惠養。得志平生。亦其分也。乃命移舟曰。要須一到襄陽山水。後老吳郡也行。次西塞山。泊舟吉祥佛舍。見江水黑而不流。曰。此下必有怪物。乃投環劍。命摩訶下取。見摩訶汨沒波際。久而方出。氣力危絕。殆不任持。曰。環劍不可取。有龍高二丈許。而環劍置前。某引手將取。龍輒怒目。峴曰。女與環劍。吾之三寶。今者旣亡環劍。汝將安用。必須爲我力爭也。摩訶不得已。被髮大噉。目眦流血。窮泉一入。不復出矣。久之。見摩訶支體磔裂。浮于水上。如有示于峴也。峴流涕水濱。乃命回棹。因賦詩自斂。不復議遊江湖矣。詩曰。匡廬舊業自有主。吳越新居安此生。白髮數莖歸未得。青山一望計還成。鷗鷺楓葉夕陽動。鸞立蘆花秋水明。從此舍舟何所詣。酒旗歌扇正相迎。孟彥深復遊青瑣。爲武昌令。孟雲卿當時文學。南朝上品。焦遂。天寶中。爲長安飲徒。時好事者爲飲中八仙歌云云。焦遂五斗方卓然。高譚雄辨驚四筵。

嬾殘者。名明攢。天寶初。衡岳寺執役僧也。退食卽收所餘而食。性嬾而食殘。故號嬾殘也。晝專一寺之功。夜止羣牛之下。曾無倦色。已二十年矣。時鄴侯李泌。寺中讀書。察嬾殘所爲。曰。非凡物也。聽其中宵梵唄。響徹山林。李公情頗知音。能辨休戚。謂嬾殘經音。先悽惋而後喜悅。必謫墮之人。時將去矣。候中夜。李公潛往謁焉。望席門通名而拜。嬾殘大詢。仰空而唾曰。是將賊我。李公愈加謹敬。唯拜而已。嬾殘正撥牛糞。火出芋啖之。良久乃曰。可以席地取所晒芋之半以授焉。李公奉承就食而謝。謂李公曰。眷勿多言。領取十年宰相公一拜而退。居一月。刺史祭嶽。修道甚嚴。忽中夜風雷。而一峯頽下。其緣山磴道。爲大石所欄。乃以十牛縻絆以挽之。又以數百人鼓噪以推之。物力竭而石愈固。更無他途。可以修事。嬾殘曰。不假人力。我試去之。衆皆大笑。以爲狂人。嬾殘曰。何必見嗤。試可乃已。寺僧笑而許之。遂履石而動。忽轉盤而下。聲若震雷。山石旣開。寺僧皆羅拜。一郡皆嘖至聖。刺史奉之如神。嬾殘悄然。乃懷去意。寺外虎豹。忽爾成羣。日有殺傷。無繇禁止。嬾殘曰。授我箠。爲爾盡驅除之。衆皆曰。大石猶可推。虎豹當易制。遂與之荆梃。皆躡而觀之。纔出門。見一虎銜之而去。嬾殘旣去。虎亦絕蹤。後李公果十年爲相也。

聶隱娘

聶隱娘者。貞元中。魏博大將聶鋒之女也。方十歲。有尼乞食于鋒舍。見隱娘悅之。乃云。問押衙乞取此女。鋒大怒。叱尼。尼曰。任押衙鐵櫃中盛。亦須偷去矣。後夜果失隱娘所在。鋒大驚駭。令人搜尋。曾無景響。父母每思之。相對啼哭而已。後五年。尼送隱娘歸。告鋒曰。數已成矣。可自領取。尼歟亦不見。一家悲喜。聞其

所習曰。初但讀經念咒。餘無他也。鋒不信。懇詰隱娘曰。真說父恐不信如何。鋒曰。但真說之。乃曰。隱娘初被尼挈去。不知行幾里。及明。至大石穴中。嵌空數十步。寂無居人。猿猴極多。尼先已有二女。亦各十歲。皆聰明婉麗。不食。能於峭壁上飛走。若捷猿登木。無有蹶失。尼與我藥一粒。兼令執寶劍一口。長一二尺許。鋒利吹毛可斷。遂令二女教某攀援。漸覺身輕如風。一年後。刺猿猴百無一失。後刺虎豹。皆決其首而歸。三年後。能飛。使刺鷹隼。無不中。劍之刃漸減五寸。飛禽遇之。莫知其來也。至四年。留二女守穴。挈我于都市。不知何處也。指其人者。一一數其過。曰。爲我刺其首來。無使知覺。定其膽。若飛鳥之易也。授以羊角匕。首刃廣三寸。遂白日刺其人於都市中。人莫能見。以首入囊。反命。則以藥化之爲水。五年。又曰。某大僚有罪。無故害人若干。夜可入其室。決其首來。又攜匕首入其室。度其門隙。無有障礙。伏之梁上。至瞑時。得其首歸。尼大怒曰。何大晚如是。某云。見前人戲弄一兒可愛。未忍便下手。尼叱曰。已後遇此輩。必先斷其所愛。然後決之。某拜謝。尼曰。吾爲女開腦後藏匕首。而無傷。用卽抽之。曰。女術已成。可歸家。遂送還云。後二十年。方可一見。鋒聞語甚懼。後遇夜。卽失蹤。及明而反。鋒已不敢詰之。因茲亦不甚憐愛。忽值磨鏡少年及門曰。此人可與我爲夫。白父。父又不敢不從。遂嫁之。其夫但能淬鏡。餘無他能。父乃給衣食甚豐具。數年後。父卒。魏帥知其異。遂以金帛召署爲左右吏。如此又數年。至元和間。魏帥與陳許節度使劉昌裔不協。使隱娘賊其首。隱娘辭帥之許。劉能神算。已知其來。召牙將。令來日早至城北。候一丈夫一女子。各跨白黑衛至門。遇有鵲來噪。丈夫以弓彈之。不中。妻奪夫彈一丸而斃鵲者。揖之曰。吾欲相見祇迎也。牙將

受約束遇之。隱娘夫妻云：劉僕射果神人，不然者，何以動召也？願見劉公。劉勞之，隱娘夫妻拜曰：得罪僕射，合萬死。劉曰：不然，各親其主，人之常事。魏今與許何異？請當留此，勿相疑也。隱娘謝曰：僕射左右無人，願舍彼而就此，服公神明耳。蓋知魏帥之不及劉也。劉問所須，曰：每日只要錢二百文足矣。乃依所請，忽不見二衛所在。劉使人尋之，不知所向。後潛于布囊中，見二紙衛，一黑一白。後月餘，白劉曰：彼未知止，必使人繼至。今宵請剪髮，繫之以紅絹，送于魏枕前，以表不回。劉聽之，至四更，却反曰：送其信矣。後夜必使精兒來殺某。及賊僕射之首，此時亦萬計殺之，乞不憂耳。劉豁達大度，亦無畏色。是夜明燭半宵之後，果有二幡子，一紅一白，飄飄然如相擊于牀四隅。良久，見一人自空而跽，身首異處。隱娘亦出曰：精兒已斃，拽出于堂之下。以藥末化之爲水，毛髮不存矣。隱娘曰：後夜當使妙手空空兒繼至。空空兒之神術，人莫能窺其用。鬼莫得躡其踪，能從空虛入冥莫，無形而滅景。隱娘之伎，故不能造其境。此即繫僕射之福耳。但以于闐玉周其頸，擁以衾。隱娘當化爲蛾螻，潛入腸中聽伺。其餘無逃避處。劉如言。至三更，瞑目未熟，果聞頂上鏗然聲甚厲。隱娘自劉口中躍出，賀曰：僕射無患矣。此人如俊鶻，一搏不中，卽翩然遠逝，恥其不中耳。纔未踰一更，已千里矣。後視其玉，果有匕首劃處，痕逾數分。自元和八年，劉自許入覲，隱娘不願從焉。云：自此尋山水，訪至人，但一一請給與其夫。劉如約。後漸不知所之。及劉薨于軍，隱娘亦鞭驢而一至京師，柩前慟哭而去。開成年，昌裔子縱除陵州刺史，至蜀，棧道遇隱娘，貌若當時，甚喜，相見依前跨白衛如故。謂縱曰：郎君大災，不合適此出藥一粒，令縱吞之。云：來年火急，拋官歸雒，方脫此禍。吾藥力

只保一年患耳。縱亦不甚信。遺其繒綵。一無所受。但沈醉而去。後一年。縱不休官。果卒于陵州。自此無復有人見隱娘矣。

韋騶

韋騶者。明五音善長嘯。自稱逸羣公子。舉進士。一不第便已。曰。男子四方之志。豈拘節于風塵哉。游岳陽。岳陽太守以親知見辟。數月謝病去。騶親弟騶舟行。溺于洞庭湖。騶乃水濱慟哭。移舟湖神廟下。欲焚其廟。曰。千金賈胡。安穩獲濟。吾弟窮悴。乃罹此殃。焉用爾廟爲。忽于舟中寐。夢神人盛服來謁。謂騶曰。幽冥之途。無枉殺者。明公先君嘗爲城守。方剛讜正。鬼神避之。撤淫祠甚多。不當廢者。有一二神上訴。帝初不許。固請十餘年。乃許與後嗣一人。謝二廢廟之主。然亦須退不能知其道。進無以補於時者。故賢弟當之耳。儻求喪不獲。卽我之過。當令水工送屍湖上。騶驚悟其事。遽止。遂命漁舟施鉤網。果獲弟之屍於岸。是夕又夢神謝曰。鬼神不畏忿怒。而畏果敢。以其誠也。君今爲人果敢如是。吾所以懷畏。昔洞庭張樂。是吾所司。願以至音酬君厚惠。所冀觀咸池之節奏。釋浮世之憂煩也。忽覩金石羽籥。鏗鏘振作。騶甚歎異。以爲非據。曲終乃寤。

圓觀

圓觀者。大歷末。雒陽惠林寺僧。能事田園。富有粟帛。梵學之外。音律貫通。時人以富僧爲名。而莫知所自也。李諫議源公卿之子。當天寶之際。以遊宴飲酒爲務。父愷居守。陷于賊中。乃脫粟布衣。止于惠林寺。悉

將家業爲寺公財。寺人日給一器食。一杯飲而已。不置僕使。絕其聞知。惟與圓觀爲忘言交。促膝靜話。自旦及昏。時人以清濁不倫。頗生譏誚。如此三十年。二公一旦約遊蜀州。抵青城峨眉。同訪道求藥。圓觀欲游長安。出斜谷。李公欲上荊州三峽。爭此兩途。半年未決。李公曰。吾已絕世事。豈取途兩京。圓觀曰。行固不繇人。請出三峽而去。遂自荊江上峽。行次南浦。維舟山下。見婦女數人。錦襠負罌而汲。圓觀望見。泣下曰。某不欲至此。恐見其婦人也。李公驚問曰。自上峽來。此徒不少。何獨恐此數人。圓觀曰。其中孕婦姓王者。是某託身之所。逾三載。尙未婉懷。以某未來之故也。今旣見矣。卽命有所歸。釋氏所謂循環也。謂公曰。請假以符咒。遣某速生。少駐行舟。葬某山下。浴兒三日。公當訪臨。若相顧一笑。卽某認公也。更後十二年。中秋月夜。杭州天竺寺外。與公相見之期。李公遂悔此行。爲之一慟。遂召婦人。告以方書。其婦人喜躍還家。頃之親族畢至。以枯魚獻于水濱。李公往爲授朱字符。圓觀具湯沐。新其衣裝。是夕圓觀亡。而孕婦產矣。李公三日往觀新兒。襁褓就明。果致一笑。李公泣下。具告于王。王乃多出家財。葬圓觀。明日李公回棹言歸。惠林詢問觀家。方知已有理命。後十二年。秋八月。直指餘杭。赴其所約。時天竺寺山雨初晴。月色滿川。無處尋訪。忽聞葛洪川畔。有牧豎歌竹枝詞者。乘牛叩角。雙髻短衣。俄至寺前。乃觀也。李公就謁曰。觀公健否。却問李公曰。眞信士。與公殊途。慎勿相近。俗緣未盡。但願勤修不墮。卽遂相見。李公以無由敘話。望之潛然。圓觀又唱竹枝。步步前去。山長水遠。尙聞歌聲。詞切韻高。莫知所詣。初到寺前。歌曰。三生石上舊精魂。賞月吟風不要論。慚愧情人遠相訪。此身雖異性常存。寺前又歌曰。身前身後事茫茫。欲話因緣

恐斷腸。吳越山川遊已遍。卻回煙棹上瞿塘。後三年。李公拜諫議大夫。一年亡。

紅綫

紅綫潞州節度使薛嵩家青衣。善彈阮咸。又通經史。嵩遣掌牋表。號曰內記室。時軍中大宴。紅綫謂嵩曰。羯鼓之音頗悲。調其聲者。必有事也。嵩亦明曉音律。曰。如女所言。乃召而問之。云。某妻昨夜亡。不敢乞假。嵩遽遣放歸。是時至德之後。兩河未寧。初置招義軍。以滏陽爲鎮。命嵩固守。控壓山東。殺傷之餘。軍府草創。朝廷復遣女嫁魏博節度使田承嗣男。又遣嵩男取滑州節度使令狐彰女。三鎮互爲姻婭。人使日浹往來。時田承嗣嘗患肺氣。遇夏增劇。每曰。我若移鎮山東。納其涼冷。可延數年之命。乃募軍中武勇十倍者。得三千人。號外宅男。而厚恤養之。常令三百人夜直州宅。卜選良日。將并潞州。嵩聞之。日夜憂悶。咄咄自語。計無所出。時夜漏將傳。轅門已閉。杖策庭除。惟紅綫從焉。紅綫曰。主自一月不皇寢食。意有所屬。豈非鄰境乎。嵩曰。事係安危。非爾能料。紅綫曰。某雖賤品。然亦有解主憂者。嵩乃具告其事曰。我承祖父遺業。受國家厚恩。一旦失其土疆。卽數百年勳伐盡矣。紅綫曰。易爾不足勞主憂也。乞放某一到魏郡。觀其形勢。覘其有無。今一更首途。三更可以復命。請先定一走馬。兼具寒暄書。其它卽俟某卻回也。嵩大驚曰。不知女是異人。我之暗也。然事若不濟。反速其禍。奈何。紅綫曰。某之行。無不濟者。乃入閨房。飾其行具。梳烏蠻髻。攢金鳳釵。衣紫繡短袍。繫青絲輕履。胸前佩龍文匕首。領上書大乙神名。再拜而倏忽不見。嵩乃反身閉戶。背燭危坐。常時飲酒數合。是夕舉觴十餘不醉。忽聞曉角吟風。一葉墮露。驚而試問。卽紅綫回。

矣。嵩喜而慰問曰：「事諸否？」曰：「不敢辱命。」又問曰：「無傷殺否？」曰：「不至是。但取牀頭金合爲信耳。」紅綫曰：「某子夜前三刻，卽達魏郡。凡歷數門，遂及寢所。聞外宅男止于房廊，睡聲雷動。見中軍士卒步于庭廡，傳呼風生。某發其左扉，抵其寢帳。田親家翁止于帳內，鼓趺酣眠。頭枕文犀，髻包黃縠，枕前露橐一七星劍。劍前仰開一金盒，盒內書生身甲子，與北斗神名，復以名香及美珠散覆其上。揚威玉帳，但期心豁于生前，同夢蘭堂，不覺命縣于手下。寧勞禽縱，祇益傷嗟。時則蠟炬光凝，爐香燼煨，侍人四布，兵器森羅，或頭觸屏風，斲而殛者；或手持巾拂，寢而伸者。某拔其簪珥，縻其襦裳，如病如昏，皆不能寤。遂持金合以歸，出魏城西門，將行二百里，見銅臺高揭，漳水東注，晨雞動野，斜月在林，憂往喜還，頓忘于行役。感知酬德，仰副于心期。所以當夜漏三時，往反七百里，入危邦，一道經過五六城，冀滅主憂，敢言其苦。嵩乃發使遺承嗣書曰：「昨夜有客從魏中來云：『自元帥頭邊獲一合，不敢留駐，謹卻封納。』專使星馳，夜半方到。見搜捕金合一軍，憂疑使者以馬撾叩門，非時請見。承嗣遽出，使者以金合授之，捧承之時，驚惶絕倒，遂留使者止于宅中。狎以私宴，多其錫賚。明日遣使賁繒帛三萬疋，名馬二百匹。他物稱是以獻于嵩曰：『某之首領繫在恩私，便宜知過自新，不復更貽伊戚。』專膺指使，敢議姻親，役當奉轂後車，來則麾鞭前馬。所置紀綱僕號爲外宅男者，本防他盜，亦非異圖。今並脫其甲裳，放歸田畝矣。由是一兩月內，河北河南人使交至，而紅綫辭去。嵩曰：『女生我家，而今欲安往？』又方賴女，豈可議行？」紅綫曰：『某前世本男子，遊學江湖間，讀神農藥書，救世人災患。時里有孕婦，忽患蠱癰，某以芫花酒下之。婦人與腹中二子俱斃，是某一舉殺三人。陰功見